



22162

Mag. St. Dr. P

Martinus


Ostliniski Martini Swada applaudens  
Theologus honori et virtuti eximiae

PANEG. et VITAE

Polon. Fol.

Æ. 1608.







SVADA  
APPLAUDENS,

Theologico Honori, & Virtuti Eximiæ,

*Perillustri, & Admodum Rndi Dñi,*

D.M. MARTINI  
WINKLER,

S. Theol: Doctoris & Professoris,

Collegæ Maioris, Ecclesiarum Collegia-  
tarum, Sandomiriensis PRÆPOSITI,

S. FLORIANI CVSTODIS,

Łanciciensis CANCELLARII, &c.

D V M

in Florentissimo Magnorum Hospitum Concessu,

PRO LOCO,

inter Clariss: Sac: Theologiæ DOCTORES,

RITU SOLENNI

RESPONDERET,

A

M. MARTINO OSLINSKI,

*Philosophia Doctore & Professore, Collega Minore,*

*Contubernii Iagelloniani Seniore,*

debitæ venerationis & cultûs ergò

in Lucem publicam,

PRODUCTA.

Anno Domini, M. DC. LXXXIII. die ix. Nouemb.

CRACOVIAE, Typis VNIVERSITATIS.



**P** Alladias acies, iræq; sepulta iocosa  
Bella, per Aonios, at non Mauortia, campos,  
Inq; triumphalem, surgentia prælia, laurum:  
Promere Musa iubet, magno spiramine ducta.  
*O Princeps, quam mille acies, quaq; ætheris alti*  
*Militia est; totidem currus, tot signa, tubaq;*  
*Tot litui comitantur, quantiq; agmine plaudunt:*  
Instrue fac mentem, pauidisq; adlabere cæptis.

Hic ubi turritus protendit ad astra Vauellus  
Culmen & excelso summus de vertice spectat,  
Crescere sub pedibus latè celsissima Craci  
Pergama, clara Viris, domibus decorata superbis.

Omnibus est longè felicior vnica moles;  
Quam super immoto fundamine condidit Orbis  
Regnatrici Sapientia, IAGELLONIS amores,  
Splendida pro Lechicis erecta palatia Mæstis.  
Doctam Praxitelis dextram, vel in ære Myronis  
Hic artem videas: pulchros vultusq; Virorum,  
Maxima quos doctus probitas clarauit alumnis.  
Hic floret fecunda quies virtusq; serena,  
Fronte grauis, sanusq; decor, luxuq; carentes  
Deliciæ, cultus recti, facunda virorum  
Ingenia; antiqui mores, candorq; verustus.  
Hanc Pallas fertur præ terris omnibus vnâ  
Dilexisse, sibi placitâ quondam Vrbe relictâ.

Dum vagor aspectu, visumq; per omnia duco;  
( Pulchra loci facies, quem non splendore moueret? )  
Audio mox mæstis impleri quæstibus auras,  
Et planctus tristes; gemitusq; per æthera spargi.  
Non, labente Numa, gemit sic Vrbe Quirinus,  
Pompeio nec celsus eques, nec Gracia Codro:  
Quàm sensi hinc mæstas intendi voce querelas.  
Tanti WINKLER erat luctus, & causa dolendi;  
Vt potuere aures tetigisse cadentia verba:  
Scilicet immistus dabat hæc suspiria luctus:  
Dulcis amor WINKLER, dulcis, MARTINE voluptas,  
Delicium Suadæ, Cor, Spiritus, atq; Medulla  
Musarum, nostri Flos æui, Gloria Stæ,  
Gemma virum, Pallas cæli quos nectare nutrit;  
Iamne tuis nunquam dabitur gaudere corymbis?  
Eheu cessisti? cessant oracla TILICI.

Hæc ego miratus, grauius prolata recepi.  
Altiùs ingredior, quæstu ducente per aulam,  
Huc, illuc voluens oculos, totamq; pererro,



Luminibus tacitis; impensè cuncta requirens;  
Nil video pompæ circum, quæ tristia prodat;  
Squalida non velat vultum, nec corpora vestis.  
Sed noua lugentum ratio, nouus ordo dolendi.  
Planctus lætitiæ speciem præferre videtur:  
Funduntur lacrymæ, at nixeo natat ignis in ore  
Purpureus, fuluq; nitet coma gratior auro.  
Luctus adest; vestis cultu supereminet omni,  
Luxuriantq; modo sine fusa monilia passim.  
Assyrio quidquid, Siculoq; effulgurat ostro,  
Clariùs hic lucet. Sed tanta reuerberat alti  
Gratia fulgoris, cui virtus Lyncea cedat.  
Non lucem, sed fulgur habent cælestia dona.

Inter eos cultus, cælos clamore fatigat  
Vna Deum, feriens crebris vlulatibus aures.  
O WINKLER mea vita, decusq; meum! mea vita!  
Iam pro te, iam dulce mori, iam mille pericla  
Dulce subire mihi, maneat dum WINKLER apud me.

Nec mora prosiliens concussit pectus, & inquit:  
Quid lugere iuuat, sit flendi expleta voluptas.  
Horrida bella geram: cur non Mauortia bella  
Fortis amor cieat? promptæ pugnemus amor.  
Arma citò rapiant sociæ, furor arma ministret.  
Splendida, quæ gestat, præstò sunt arma Mineruæ;  
Nec semper Cytharam pulsat formosus Apollo,  
Auratam, quandoq; volens iacit arte sagittam.  
Et nos arma iuuent, his defendamus honorem,  
Gracia pro magno quod si contendat Homero?  
Ac Vrbes septeno contra se agmine ducet?  
Scimus vt incerto toties lis Marte dirempta.  
Smyrna, Rhodus, Colophon, Salamin, Chios, Atticæ, Athenæ,  
Fortiùs instantes, tanto conamine claræ.  
Mortuus hæc potuit? quòd carmine fortia gesta  
Grandifono, magni quondam celebravit Achillis,  
Non sine mentito vaturn depicta colore?  
Me certè duris genuit sub cautibus horrens  
Caucasus; & Lybicæ lactauit tygridis vber:  
Nullus amantis si est nostro sub pectore sensus,  
Arma velint, poscantq; simul, capiantq; Camænæ.

Vt belli signum in medio Regina Sùada  
Extulit: & rauco strepuerunt cornua cantu:  
Extemplo turbati animi, velut omne tumultu  
Coniuret Latium trepido, cùm Troius Heros  
Inclytus, Ausoniis super aduena constitit oris.



Æstuat in bella, arma petens Heliconia pubes;  
Pars aptat clypeos, pars lucida spicula torquet.  
Quàm pulchrum resides populos, desuetaq; bello  
Agmina, Gradiui luctantis in arma vocari?  
Purpureis assueta rosis, calatissue Mineruæ  
Dextera romphæas flectit, Lyciamq; pharetram.  
Ipsa inter primas præstanti corpore Suada  
Vertitur arma tenens; & toto vertice supra est,  
Cæruleam gestans aurata in casside cristam,  
Ipsa Quirinali lituo, pulchroq; decora  
Ornata, chlamidem cælestiq; iride vestit.  
Huic superaduenit sacra de gente Pœsis,  
Agmen agens peditum, & flores ære cateruas:  
Bellatrix assueta pati mandata, parendo;  
Docta pedum cursu volucres præuertere ventos.  
Mentis Apollineæ quoq; vis mouet vndiq; Musas.  
Ibat Aristotelis proles pulcherrima bello,  
Militiæ robur ductans, certamine felix.  
Et iam Mars sæuus, Lechicis qui præsidet aruis,  
Instructas relegens acies, certare paratus.  
Qui circumferat, hostis abest, contraria signa.

Panditur interea Diuinæ Palladis aula,  
Diues opus, tectum non centum insigne columnis,  
Sed quantæ Superos, cælumq; Atlante remisso,  
Sustentare queant; facit hoc vicina Tonantis  
Regia, stare sibi socium, fulgere pyropis.  
Ipsa Deum Princeps Tyrio Sapiencia cultu,  
Pegmate sub roseo rutilâ redimita coronâ.  
Hanc verò circum vittati grande Senatûs  
Concilium, socians animas, & mutua iungens  
Pectora, quæis quondam fulsa est Ecclesia Mater,  
Et quoq; nunc tegitur; sacrisq; curulibus omnes  
Ad dextram, laeuamq; sedent: spectatur vtrinque  
Canities veneranda Patrum; pars igne corusco  
Tota ardens; pars stelliferis innexa coronis;  
Tergeminas latatur pars gestare tiaras;  
Pars roseo splendore galeri fulget in ostro;  
Cæruleâ veste est violis pars æmula pulchris:  
Anthracynis videas plures gaudere corymbis,  
Absq; modo, numeroq; quibus sunt nomina mille;  
Nec confusus honor. Sed quatuor ordine primis,  
Prima datur sedes: reliquis concessa secunda  
(Hos propè spectauit clarum consistere WINKLER)  
Gloria: plebeio stat cætera more Iuuentus,



Obsequiis famulata Deæ, pars atria longè  
Observans, arcanis pars penetralibus adstans:  
Atq; ancillarum glomerata manus sine ruga,  
Ad nutum Dominæ quævis decurrere iussa  
Aduigilans semper. Post cùm resonabilis Echo  
Ad postes strepitum veloci pertulit ictu;  
Protinus excurrit senior, quæ nomine VIRTUS:  
[Innuic vt fulgens vestis] simul agmina vidit  
Hostica cum Ducibus, rupit de pectore vocem.  
Quæ genus? vnde domo? vel quæis venistis ab oris?  
Quid petitis? contra quem armata castra mouetis?  
Oria nos colimus; sacra oria condimus Orbi:  
Sed seruire DEO, Mensisq; accumbere Diuûm,  
Maxima pars nostri, potiorq; laboris. At vna:  
Theologas arces petimus, decernere Marte  
Æquo flagrant, cûi cedere debet amicus;  
Prælia portamus, cessuræ nec nisi victæ.  
Excipit ista stupens, causam quæritq; furoris,  
Quæ tumidas duxit tanta in discrimina rerum?  
Quærit, cuius egentes venerunt? Tamen illa:  
Theologas ædes ruimus, certare paratæ:  
Gloria nos animat, stimulant exempla priorum,  
Virtutis pretio; repetendo vindice dextra  
Delicias animi, MARTINVM WINKLER: vt illo  
Regia nostra queat gaudere. Sed intulit ista:  
O curas steriles! quantum est in rebus inane!  
Vosne Gyganteis ædem tentare Deorum  
Ausibus aggressæ? nec vos exterruit ira  
Sæua Deûm; ruptiq; cauis fornacibus ignes?  
Est DEVS in Nobis, agitante caleſcimus illo:  
Novimus & Siculi fastum superare Pelori,  
Præsida mente DEI: cuius nos maxima cura  
Vrget, inoffensa ac semper manet æqua potestas,  
Prospicit hic positas excelsis montibus Vrbes,  
Et mare ventosum, terrarum imosq; recessus:  
Hic varias rerum formas, & quidquid ubiq; est,  
Suauiter omnipotens disponit: seligit atq;  
Æthere felices animas, quæ tempore certo  
Auratos moneant Orbes, & luce serena  
Irradiant mundum, sublimi sede locatæ.  
Credite non quidquam fieri sine numine Diuûm.  
Nec virtus angusta, suæ vestigia vitæ  
Huc meritis flectens, pretio caret; imò triumphis  
Excipitur magnis: digno quos gloria WINKLER  
Apparat; & quamuis præclara modestia vultu,  
Hæc fugiat, Diuinum aliquid spirans: fugientem



Illa tamen sequitur, plausu studiisq; per Orbem,  
 Immortale ferens nomen; sua condere virtus  
 Quod potuit, lucisq; capax, & amica rogata  
 Vis animi fecit summum, sub Pallade docta.  
 Plura loqui voluit; præsumpit Suada loquentem:  
 Flos tamen eloquii nitidus, nectarq; disertum,  
 Et quidquid mea regna tenent, est celsius illi:  
 Nestora quo superat: præ cunctis Tullius ipse.  
 Imperii fasces deferat: præferre nec audet  
 Solus, ni socio regni, sua munera, WINKLER  
 Committat, genium sapientis qui regat ævi.  
 Et rexit Superis fortunam augentibus ipsam.  
 Agnouit Charites, celebris LVBRANSCIA Posnæ  
 Musarum sedes; nunquam felicius aucta  
 Dotibus eloquii, quam cum mellita diserti,  
 Regnat vox Cathedris & Gloria WINKLER.  
 Hanc Lechicæ pubis, semper selectus amavit  
 Flos, velut Herculeâ deuinctus sorte catenâ,  
 Sponte sequebatur, celebrans præconia laudis.  
 At minor Orbis Alexandro hic; nec pectoris alti  
 Esse capax potuit; sed debuit ipsa TILIC  
 Cessisse in palmam Cathedra, ex qua compare nutu  
 Iura daret populis leges capientibus ultro.  
 Par certè auspiciis, clarus sudore decenni,  
 Hic nouus armipotens Troiæ expugnator Achilles.  
 Pellatim iuuenem melius sed dicere fas sit:  
 Quippe triumphator, calamiterissimus omni,  
 Toto victrices laurus circumtulit Orbe.  
 Nunc dixisse iuuet: MARTINVS WINKLER amores,  
 Et stupor Europæ, vis, gloria maxima Suadæ.  
 Cuius ad eloquium Regum diademata vitam  
 Visa tenere suam, quamuis fatalia Parcæ  
 Stamina soluissent. viuit LVDOVICA perennis,  
 Regia Lechiadum claris insignis Amazon  
 Actibus: & manibus WINKLER dat lilia plenis.  
 Sarmata REX MICHAEL, quam ferrea fata negarunt  
 Ætatem imperii, WINKLER laude obtinet amplam.  
 Hoc tandem superest, Regum placuisse IOANNI  
 Delicio, Scuto, Gemmæ, Augustoq; Pioq;  
 Quid cupitis maius? satis est dixisse; IOANNEM  
 Laudauit WINKLER: pariter laudatus & ipse.  
 Ergo qui meruit Regali, Iudice tanto,  
 Indole par fieri Præses, non ille doloris  
 Congeret irrequieti causas; pectus amicum



Durius ut vexent? tanti est hæc summa duelli.  
Alta fatigatio gémans suspiria corde,  
Conticuit. roseo tum Virtus ore locuta est.  
Lege quod æterna fixum est, non corruct vnquam.  
Hæc adamantæo quoq; stat sententia scripta  
Ductu. Theologos ut WINKLER nactus honores,  
Emeritâ Doctor redimigis tempora lauro,  
Praferat hanc semper, non ultra sede relicta.  
Scilicet excelsæ mentis maiore theatro  
Jam debet genius spectari; iamq; secundis  
Prouehitur votis, quò se vocat indita virtus.  
Fræna tuo, felix iam tandem Suada, dolori  
Inice, nec duro miseram cor vapulet æstu.  
Ast agent placidè lætam noua gaudia mentem.  
Est tuus iste decor, WINKLER decoratus honore:  
Sistis in augusta facie, lucisq; theatro,  
Peruenis ad fasces, & pulchræ iura coronæ.  
Surgat in obsequium laudis mens excita luctu,  
Inq; triumphales se laxent omnia cantus.

Hæc ubi dicta dedit, p lausu excepere frequentes  
Musarum cætus redeuntem ad tecta Paterna.  
At nitidos Patrum vultus, & oramq; Senatûs  
Theologi faciem, votiuus plausibus intûs  
Exundare videns, genitrix iam Suada leporum,  
Exuta armorum rabie sic lætior inquit.  
Arma viri tractent, quorum mens dedita Marti;  
Imbelles Musæ celebremus nomina laudum.  
Omnia iam latis subsultent plausibus; omnes  
Iam lætæ meritum WINKLER Pæana canamus.  
Ac velut in pratis, vbi apes æstate serena,  
Floribus insidunt variis, & mellea circum  
Munera depascunt, strepit omnis murmure campus:  
Haud aliter Musæ, pulchro simul agmine currunt:  
Pars cytharas, buxosq; caput, pars barbita tendit,  
Curarumq; expers, lacrymas exosa iuuentus  
Exultat, toto relegans suspiria cælo.  
Latantum fit dulcè melos: per deuia mundi  
Iam dulces resonant cantus, vocumq; suaves,  
Concentus fiunt: plausûs modulamina regnant.  
Quisq; suum iam tangit ebur, iam cymbala pulsat:  
Passim secundis decurrunt carmina riuis.  
Pars niueas dotes animi cultusq; inuentæ  
Concelebrat, mellitos pars extollere mores  
Gestit ouans: mite ingenium pars ornat amore.



Promocat in laudes meritas hinc dulce loquendi  
 Pondus, & vndantis victrix opulencia linguæ:  
 Illinc palmaris cantu Sapientia complet  
 Ora virum. Ausonios illi DOCTORIS honores  
 Extollunt: sacra hi formant præconia Suadae,  
 Omnibus hic communis honos; mens omnibus vna:  
 Omnes lætifico declarant gaudia vultu.  
 Latior at reliquis præstans dulcedine linguæ  
 Suada, suum reputans tantum deus, explicat omnem  
 Congenitam lucem, pandit variosq; decores.  
 Quam sequitur Charitum concors & culta corona.  
 Ipsa triumphanti similis Dea; symbola pompæ  
 Gestat, & exultans cupidè iactare videtur:  
 Dextra manus palmam, frons gaudia, corpus odorem,  
 Candida pariferam conuoluunt tempora laurum.  
 Hoc vnum genuit, dulces æstatis amores,  
 Veris opes; violas, narcissos, lilia, amomos,  
 Et reliquam florum turbam quod tempora demant.  
 Fert tamen & flores inscriptos nomina Regum,  
 Appenditq; tholo DOCTORIS, quo schemate laudes  
 Insignes referant: victricem deniq; Laurum,  
 Symbolon æternæ famæ, suspendit ad aram;  
 Quam magni in cathedra Suada peperere labores.  
 Stoaq; cum posuit pallam, quæ murice tincta est:  
 Et Pindus culmen tanto submisit Honori.  
 Vota fluunt, cælosq; meant, ac astra fatigant:  
 Viue diu felix Pyliam superando senectam:  
 Deliciæ Regum, sed Suadae gloria VIVE.  
 Aurea tot numeros illustres sacula DOCTOR,  
 Quot meruit virtus, quot gemmea scripta merentur.  
 Adstrictam numeris magno sub nomine Suadam,  
 Ingenio facili, vultu dignare sereno.  
 Quæ tibi sacrati monumentum stabit HONORIS.




BIBLIOTH. UNIV.  
 JAGELLONICAE





Biblioteka Jagiellońska



stdr0016791



